









LA

# H A R A N G V E

*Coll. bij Paris. 841. 1. 6*

DE PAR LA NOBLESSE  
DE TOVTE LA FRANCE,  
Au Roy tres-chrestien Charles neufies-  
me, tenant ses grans Estatz en sa ville  
d'Orleans, le premier iour de Ianuier,  
mil cinq cens soixante. Faite par hault  
& puissant seigneur,

MESSIRE IACQUES DE SILLY,  
Cheualier, Gentillomme ordinaire de la  
chambre, Damoiseau de Commercy, Sei-  
gneur des Baronies de Rochefort, Aul-  
neau, & Montmirail, &c.



A PARIS,  
Chez Charles Perier, rue Sainct Iean de  
Beauuais, au Bellerophon. 1561.

A V E C P R I V I L E G E,  
& permission du susdict Seigneur.

THE NEWBERRY  
LIBRARY

*Crampin*



CASE

F

39

.326

156156

A TRES-HAVLT TRES-PVIS-  
SANT ET TRES-ILLVSTRE

Prince Antoine de Bourbon

Roy de Nauarre.

**L** Es çieus encor' roulans nous r'amenent les guides  
Pour ce peuple conduire à la voje immortelle.  
Le Soleil ses cheuaus nouuellement atelle,  
Et les-va galloper par les carrieres vuides.  
Ie voy def-ia cachés les trois signes humides,  
Ie voy fouir Saturne: & la flamme iumelle  
De ses filz embraser en nous l'ardeur nouvelle,  
Qui nous pousse aus effetz des causes plus liquides.  
Du troupeau écaillé la bande est terminée.  
Pour nous miëus éclairer, voici la bandeignée.  
Le Lion dans ces feus au ciel apparoissant,  
L'astre aussi que Dieu fait par sa bonté connoistre,  
Sous Charles, & sous vous, feront en brief renaistre  
Le Siecle tref-heureus des Siecles renaissant.

De vostre Maiesté le tref-humble suget  
& tref-obeïssant seruiteur,

Bernard du Poy-Monclar de Luc.

## A TRESHAVLT

ET PVISSANT SEIGNEVR,  
 MESSIRE IACQVES DE  
 Silly, Cheualier, gentillomme ordina-  
 re de la chambre, Damoiseau de Com-  
 mercy, Seigneur des Baronies de Ro-  
 chefort, Aulneau, & Montmirail, &c.



MONSEIGNEVR, les  
 Romains pour nous fai-  
 re preuue de la grandeur  
 de leur republicque, &  
 pour continuër longue-  
 ment leur renommée par la memoire  
 des suruiuans, d'un grand trauail & pe-  
 nible exerciçe se sont rendus admirables  
 par les armes, & la superbe magnificen-  
 çe de la hauteur & beaulté de plusieurs  
 édifices & structure de tant de beaux ba-  
 stimens, seul sujet des exçellans & do-  
 ctes architectes. & encores moins imita-

bles, par les artz & ſciences. deſquelles,  
d'autant que leurs ſucceſſeurs nous ſem-  
blent malicieuſemēt ou par nonchalan-  
ce auoir meſpriſé la cōnoiſſance, ne nous  
ont laiſſé que ruïnes, & grand nombre de  
pièces que malaiſement toutz enſemble  
ſcaurions rapporter à leur moindre & en-  
tiere partie. ou bien peu, comme le gla-  
neur, recueillir les eſpis apres ces diligenz  
moïſſonneurs. C'a eſté par la ſeule opi-  
nion des Rois & des Nobles lumiere &  
exemple de toutz. qui legierement ſe laiſ-  
ſoient perſuader, que les lettres effemi-  
noient les ſoldatz, & diminueoient de leur  
cruaulté. ou pour auoir deſdaigné la diſci-  
pline du populaire, parmi lequel, les let-  
tres ont eu touſ-iours quelque rang. iuſ-  
ques à noſtre temps, que les plus illuſtres  
ont reconneu leur faulte. & ont commen-  
cé a reprendre les erres des hommes ver-  
tuëus. ſi bien que maintenant la France  
n'eſt dauantage en admiration pour les  
armes que des lettres. car nous eſtimons  
grandemēt les perſonnes genereuſes qui  
en l'vn



en l'un & l'autre exerciçe ont employé  
 l'vsure de ceste perissable vie . tellement  
 que feu Monseigneur de la Roche . guion  
 vostre frere , ni vous , n'aués esté miëus cõ-  
 neus & honorés entre les François , admi-  
 rés des étrāgiers , pour estre issus des plus  
 anciennes maisons des Ducs & Comtes  
 d'Alemaigne , Angleterre , Bretagne ,  
 Champaigne & Bourgoigne : auoir de  
 grans biens , & estre des premiers en Fran-  
 ce : auoir tous iours bien faict en plusi-  
 eurs batailles , assaultz de villes , & à beau-  
 coup de rencontres à la guerre : que pour  
 auoir deuançé maintz autres par les let-  
 tres , & auoir bien sceu ioindre & marier  
 les armes au scauoir . j a il en France gen-  
 tillomme pour auoir bien les armes en  
 main , pour estre bien à cheual , pour bien  
 faire le debuoir de son estat , qui aje ac-  
 quis plus grand bruiet & honneur que  
 vous ? Pouuoient les deputés de par la No-  
 blesse de toute la France , nommer gen-  
 tillomme plus capable pour porter la pa-  
 rolle au Roy de leurs doleançes ? cẽtai-

nement vous estes en reputation de tres-  
vertuëus, affectionné aus lettres, & aus stu-  
diëus des entreprises loüables. Plusieurs  
ont receu de voz bien-faitz. vous estes  
des premiers, entre quelque nombre, qui  
faites du bien à ceux, qui ont volonté de  
suiure les artz & disciplines. qui faites se-  
cours à ceux qui ont quelque adresse pour  
paruenir à la connoissance de la perfe-  
ction des causes recommandables. & aués  
tant en tout auançé, que diffiçillemēt les  
Nobles eussent peu eslire seigneur, qui  
mieus eut sceu instruire vn ieune Roy de  
se bien maintenir avec ses sugetz, policer  
vn Rojaulme, & le garder en paix & tran-  
quillité, que vous, par vostre Harangue  
aués fait. Laquelle a esté de toutz si desi-  
rée, & vous Monseigneur, par tant & di-  
uerses fois en aués esté requis pour le biē  
publicq, que ne pouuies honnestement  
refuser de la nous communiquer. d'ont  
m'estant baillée pour la publier, & la re-  
présenter telle que l'aués faite & pronon-  
cée, j'ay esté fort aise, d'auoir ce moyen

pour

pour témoingner l'obligation des bien-  
faitz que vous aués sur moy: affin que si ie  
ne puis par autre maniere m'acquitter en-  
uers vous: au moins, que ie vous declaire  
publicquemēt l'affection que i'ay de sui-  
ure la volonté de voz commandementz.

De vostre Seigneurie le tres-hum-  
ble & tres-obeissant seruiteur,

Bernard du Poy-Monclar de Luc.







## H A R A N G V E

DE PAR LA NOBLESSE  
DE TOVTE LA FRANCE,

Faite au Roy Tres-chrestien Charles  
neufiesme, tenant ses grans Estatx en  
sa ville d'Orleans: par le Seigneur de  
Rocheport, Aulneau & Mōtmiral, &c.



SIRE, DIEV tout puis-  
sant & éternel est le vray  
Roy non seulement de la  
terre, mais de tout vniuer-  
sellement. Qui a créé &  
disposé chascune chose

en son ordre: & j a constitué vn chef &  
cōducteur, comme vn seul Soleil au ciel.  
Et pour quelque representation de sa grā-  
deur & diuinité, il a establi sur le peuple  
les Rois tres-bons & tres-puissans: bons,  
pour bien faire à tous: & puissans, pour  
chastier les meschans: dont anciennemēt  
estoint nōmés compagnons des Dieux.

1. Chro. 28.  
1 Reg. 3.  
Parali. 1.  
Sag. 6. 9.  
Ecclesia. 9.  
Iosué. 12.  
Danie. 4.  
Psal. 2. 136.  
Luc. 22.  
Roma. 13.  
Act. 4.  
Gene. 1.  
Psal. 136.  
Platon au  
crit. & du  
regne.  
Plutarque.

## HARANGVE DE

Deut. 17.  
Iere. 29.

S. Pier. 1.  
chap. 2.  
1. Timo. 2.  
Tit. 3.  
Sapien. 6.  
Roma. 12.  
& 13.  
Ephe. 6.

& enfans de Iupiter, ce que disoit Vespasian ordonnés fatallement. & pour difference des autres hommes, en l'escripture sainte sont nommés Anges de Dieu, ou Dieus secondaires, ou lieutenâs de Dieu, executeurs de sa volonté, & cōseruateurs de ses tres-sainctes Loix. pour la prosperité desquelz naturelz du royaume, fut cōmandé aux enfans d'Israël, de prier Dieu. à eulx, le peuple se doibt rendre suget comme au souuerain: & aux Princes & gouuerneurs, entant qu'ilz sont commis & auoués des Rois, qui ont toute puissance. Ainsi nous François voz tres-humbles & tres-obeissans sugetz, vous reconnoissons pour nostre naturel Roy & souuerain seigneur, & vous supplions d'auoir pour agreable l'obeissance & fidelité de ceste Noblesse, qui veult & desire fermement perseuerer en la volonté de vous seruir, obeïr, subuenir à voz affaires, & employer ses biens & personnes par vostre commandemēt. Et puis qu'il vous a pleu Sire, continuër si sainctemēt ceste assemblée

blée des Eſtatz, affin qu'ayant librement entendu d'un chascun ſes doleançes, vous j puiſſies par voſtre bon & tref ſaigé Cōſeil pourvoir, ſelon que verrés eſtre raiſonnable: auant que ie vous declaire les noſtres, ie vous ſupplie tref-humblemēt, qu'il vous plaiſe prendre en bonne part, ce que m'eſt chargé vous dire.

SIRE, puis que voz ieunes ans ne peuvent permettre, que ſeul entrepreniez la charge de tant d'affaires qui vous pourront ſuruenir: Nous approuuons de tout noſtre pouuoir, qu'à l'exemple d'Alexandre ſi grand Empereur, ajés employé voſtre tref-illuſtre & tref-vertüeuſe mere la Rojne, non ſeulement à voſtre garde, ainſi que madame Anne à celle du Roy Charles huitieſme ſon frere, mais auſſi au gouuernement de voz affaires. Pareillement approuuons & loüons qu'à voſtre conſeil ayez appellé le Roy de Nauarre, & autres Prinçes de voſtre ſang, qui naturellement ſont affectionnés & enclins à la conſeruatiō, augmentation & proſpe-

Plutarque  
en la vie de  
Alexandre.  
Olympie  
mere à Ale-  
xandre.

Annales de  
France.



## HARANGVE DE

Roboam cō-  
neur si faul-  
te pour n'a-  
voir creu  
au conseil  
des anciē.  
1. Reg. 12.  
2. Chro. 10.

Dion, &  
Suetone au  
16. 29. 29.  
66. 72. de la  
vie d'Augu-  
ste.

Annales de  
France.

Plutarque  
en la vie  
d'Alexād.

Rois enui-  
ron. 16. ans.

1. Reg. 2. 3.  
Matt. 6.  
Sag. 7.  
Eccle. 37.  
Plutar. &  
de Traian.  
Prouer. 2.

rité de vostre Royaulme. lequel pour bien  
administrer, ne pouuies faire meilleure  
election, que de telz Prinçes & Seigneurs  
de long temps experimentés. par qui vo-  
stre Noblesse reçoit plus volontiers voz  
commandemens. en quoy, nous semble  
veoir l'Empereur Auguste, qui emploja  
en son conseil Agrippa & Meçenne: l'un,  
pour la deffence de son païs: & l'autre,  
pour le maintenir en paix. tellement, que  
nous esperons vne tranquillité vniuersel-  
le. & que vous Sire, ainsi par eulx instruit,  
nous représenterés quelque iour la gran-  
deur non seullemēt d'un Charles huitief-  
me, ou Philippe le conquerant, ou saint  
Lois, qui à douze ans ou environ, furent  
Rois: mais un Alexandre, & en prudence  
un Salomon, qui en bas aage commēce-  
rent à regner. Le peuple des-ia craignoit  
Salomon, le voyant en sa ieunesse si sage:  
& pourçe qu'il nous aduertit, que le con-  
seil du Roy, est le cueur du Roy, ç'est à di-  
re, l'aduis & deliberation de son conseil:  
nous trouuons bonne son opinion, avec  
celle



celle de ceulx, qui dient qu'à vn Roy il fault eslire des amis pour entendre ses affaires: tels toutesfois, que le Prince mesme en puisse respondre. & non ceulx qui la plus part inclinās à leur bien, en font leur profit au dōmage du Roy qui les a employés. ainsi qu'en France voulurent faire Eude & Childerich. & qui pis est en l'Empire Materne & Clēandre Frigien, lesquels après auoir conneu les affaires, se voulurent malicieusement faire Empe- reurs: & cōspirerēt la mort de Commode leur maistre. ce que ne sera iamais trouué estrange entre ceulx, qui sçauēt bien, qu'il est fort difficile à personnes qui cherchēt tāt leur profit, de satisfaire à leur hōneur.

Isocrate à  
Nicocle.

Annales de  
France.

Herodian.

Prouerb. 3.  
& 17.  
Psal 37.  
Aristote. 2.  
Polit. 3 &  
10.  
2. S. Pierre.  
& à la loy  
fi. de fi-  
de iustru.  
aus dig. &  
sur la distin-  
ction 40.  
caueant il-  
lud &c.  
Iob. 29. 30.  
31.

Exo. 18.  
Deut. 1.

Sire, ie vous feray entendre les dolean- çes de nostre estat, après que briefuement ie vous auray discouru d'ont il est venu. Les Nobles ont esté ordonnés de Dieu, pour la fidelité & obeissance de leurs Rois, & la deffence de leurs sugetz. Dont disoit Iob, qu'il estoit craint comme vn Roy. & en la republique des Israëlites fu-

## HARANGVE DE

Tite Liue  
au. 1. Aristo  
re au. 2. des  
Politiq. cha  
pi. 4. & Pla-  
ton parlant  
de la repu-  
bli. de So-  
crate.

Deut. 3.

1. Paral. 23.  
1. Reg. 1.

rent institués septante des Nobles, & plus  
vertueux pour estre la force de tout leur  
païs. & ne se trouue deuât les ceremonies  
des sacrificateurs Caldées, & de Numa,  
qu'en la republique j eust autre estat, que  
celuy de la Noblesse & des Artisans. &  
mesme Romule, n'en fist que deux. puis j  
ajousta les cent Senateurs. & nous semble  
veoir le corps humain, ou n'y a que deux  
parties principales, la teste, qui nous re-  
presente le Roy, & le cueur qui est la par-  
tie noble. desquelles si l'un ou l'autre est  
blessée, il n'est possible que l'homme puisse  
plus viure, ou estre à son aise. Pareillemēt  
au ciel, le Soleil & la Lune, nous represen-  
tent le Roy & la Noblesse: tellement que  
quand aduient éclipse d'entre eulx, toute  
la terre en demeure obscure. si le Roy ne  
s'accorde avecq ses Nobles, ce ne seront  
que troubles & seditions. & quand il les  
maintient, ilz le deffendent, conseruent,  
& sont tous-iours les premiers à son se-  
cours: cōme l'on dit vulgairemēt, Que le  
bon sang court tous-iours à la partie bles-  
sée.

ſée.à ceſte cauſe, les Nobles par toutes re-  
publicques, ont eſté à iamais autorifés  
par grâs priuileges d'armes,& habitz:que  
les autres n'oſoient porter.mefmes parmi  
les Thraçes le gentillomme ſeul alloit à  
cheual.& à Romme, les femmes des No-  
bles,alloient en liètiere.Les Rois voz pre-  
deceſſeurs par leurs ordonnâces,ont con-  
tinué ſi longuemēt à les j maintenir, que  
le gentillomme a eſté ainſi conneu, priſé  
& honoré. Ce que pluſieurs des autres  
eſtatz ont voulu enſuiure, ſouz couleur,  
que deux grans filloſofes ont fait quatre  
parties de la Nobleſſe: les vns pour eſtre  
filz des Nobles: les autres pour eſtre potē-  
tatz & grans en l'adminiſtration des repu-  
blicques: les autres pour ſ'eſtre expoſés au  
hazard de la guerre, & j auoir acquis til-  
tre de Cappitaines: & les derniers pour a-  
uoir inuenté qlque art ou diſcipline.mais  
ceulx des trois parties, en abuſant ainſi,  
ont eſté cauſe d'un deſordre & miſerable  
meſlange entre le peuple: & de grande  
perte au Roy de ſon reuenu: deſirât chaſ-

Alex.d'Ale-  
xandre. 5. li  
ure.cha. 19.

Platō en ſa  
repub. &  
Ariſtote au  
4. des Poli-  
tiq.cha.3. &  
au.3.chap.  
10. 11.

Ariſtote.en  
ſon.2.3. des  
Politi.



## HARANGVE DE

cun à l'affranchir, comme filz estoient  
gëuillommes de nom & d'armes. Vn au-  
tre mal est aduenu sur l'estat de la Nobles-  
se, & nous semble que noz predecesseurs  
en ont esté cause, ainsi que celuy qui a fait  
le trait, duquel après a esté blessé ou tué.  
c'est qu'eux vojans le grand zele de leurs  
Rois Childebert, Pepin, Loïs septiesme,  
Dagobert, Sainct Loïs, Robert, Philippes  
le Bel, Charlemaigne, Philippes de Va-  
lois, & autres, à l'augmentation de la reli-  
gion de Iesus Christ: qui à bonne & iuste  
cause ont remis les Papes en leur siege: &  
fait bastir tant d'Eglises & Monasteres,  
d'ont le nom vous est demeuré de Roy  
tres-chrestien: que les Nobles ont fait le  
semblable selon leur pouuoir, & ont don-  
né tant de biens à l'eglise, qu'ilz ont ruiné  
& dissippé noz patrimoines. & qui pis est,  
leur ont baillé la iustice: d'ont la plus-part  
en abuse tellement, que le gentillomme  
en est si persecuté & chiquané, qu'j ayant  
encores employé le reste du sien, il se trou-  
ue en arriere. & n'a moyen promptement  
comme

Annales de  
France.

Le sembla-  
ble est éi-  
crit Cauf.  
23. q. 3. cha.  
Maximia-  
nus. & cha.  
ab Impera-  
toribus. &  
touchât les  
Princes.  
Act. 23. &  
S. Augustin  
à Deme-  
trie en la  
cauf. 23. q. 5.  
cha. Princi-  
pes, Regū,  
Administra-  
tores. & au  
fest. grandi  
non imme-  
rito, de sup-  
pl. neg. pla.



comme il voudroit, venir à vostre mandement, pour vous faire le seruice qu'il vous doibt. Mais qu'est-il besoin de bail-  
 ler l'exercice de la Iustice à l'église, puis  
 qu'elle n'ajât les mains sanglâtes ne peut  
 faire l'execution ? Il fault que le prestre  
 regarde à son estat, qui est de prier Dieu,  
 & non qu'il coure le lōg des ruës pour sol-  
 liciter, qu'il s'entremesse & embroille des  
 affaires temporelles & du mode, qu'il ne  
 soit scandale ou fable au peuple, & n'en-  
 trepreingne les querelles, au lieu de cher-  
 cher & mojenner la paix. il se doibt con-  
 tenter du reuenu pour son entretenemēt.  
 le prestre doibt faire son debuoir, pour la  
 charge qu'il a prise, de prier Dieu, pres-  
 cher, enseigner, & administrer les autres,  
 comme lumiere & sel de la terre. quand il  
 feroit au contraire & oblieroit sa charge,  
 le Roy j doibt employer la main de sa iu-  
 stice, & j faire prouoir à l'imitation d'He-  
 zechie Roy, qui mist ordre aus Euesques,  
 aus prestres & Diacres du temple, & or-  
 dōna prouision pour ceux la qui vacque-

Au ca. his à  
 quibus. Cauf.  
 23. q. 2. 4. 8.  
 aus cha. Cle-  
 ri. De epis. Sē  
 tēt. Decret. 3.  
 tit. 5. cha. no-  
 uimus liure 5.  
 tit. 40. de ver.  
 signi. cha. at fi  
 clerici. liu. 2.  
 tit. 1. de iudi.  
 & partout le  
 tilt. 39. de sen  
 tē. exco. liu. 5.  
 aus Decreta.  
 & au cha. cū  
 non ab homi  
 ne extra de lu  
 di. & aus ca-  
 nons Nemini  
 & Episc. dist.  
 45. & S. Matt.  
 cha. 26.  
 Tit. 1. & S. Hie  
 ro. sur ce cha.  
 & S. Gregoire  
 au cha. in S.  
 R. Ecclesia.  
 distinct. 92  
 Malac. 2. Le-  
 ui. 26. Deut.  
 28. 1. Timo.  
 3. 5. Matt. 28.  
 Mar. 16. Luc.  
 24. Ioan. 20.  
 Esa. 56. Ier. 6.

Matt. 5. Mar.  
 9. Luc. 14.

## HARANGVE DE

8. quæst. 1.  
chap. si igi-  
tur.

2. Paral. 31.

Annales de  
France.

1. Paral. 9.

1. Timo. 3.

Tit. 1.

Caus. 13. q.

8. & à la di-

stinct. 40.

chap. multi

sacerdotes.

& en la di-

st. 36. cha.

oportet, &

illiteratos.

roient à la lecture de l'escripture saincte. Voz predecesseurs aussi le Roy Charles septiesme, par l'assemblée qu'il fist faire à Bourges de l'église Gallicane, & le Roy Loïs vnzième, en ceste vostre ville d'Orleans, touchât la Pragmaticque Sanction se mirent en ce debuoir. si bien, que nous trouuons que Philippes le cōquerant, n'a esté plus loué d'auoir banni les Iuifs de son Roiaulme, & fait la guerre aus Albigeois. ni Loïs siziesme, pour auoir secouru les Papes Gelas, & Paschal, cōtre l'Empereur Héri. que l'on admire Charlemaigne, & son filz Loïs debonnaire. que l'on reuere Constātin, & Guillaulme Duc de Normandie. non tant pour auoir fait bastir des églises, qu'auoir reformé l'estat de Prestrie. d'autāt que ceux qui ont la charge des ames & choses spirituelles, il fault aussi q̄ soient personnes dignes de l'estat, & comme disoient Constantin & Constantins filz à Constantin, qu'ilz aient bonne ame comme ministres de Iesus Christ, & dispensiers des misteres de Dieu. Le reiglement



gement des Prestres Sire, se peult faire, quād les cōtraindrés toutz sans nul exempter, de resider sur leurs benefices. ainsi que des-ia par plusieurs de voz ordōnances & edictz leur a esté commandé. & la ilz communiqueront le bien des églises, aus pauvres. & se mettront en debuoir de faire leur estat de prescher. telle reformation aussi sera louïable & digne de Roy tref-chrestien, quand presenterés les benefices à personnes capables: suiuant les arrestz des Concilles & de la tref-saincte église catholique. si au contraire les bailliés, vous remettriés voz sugetz en plus grand trouble,abus, & ignorance que iamais. d'autant qu'ilz ne pourroient estre biē instruietz, pour le debuoir qu'ilz ont à leur salut & l'obeissance que doibuent à vostre majesté. & vous Sire, en pourriés estre enuers Dieu responsable, qui s'en pourroit offencer. tout ainsi que l'on lit de Theodorich & Theodebert. qui moururent miserablement, pourçe qu'ilz commencerent à bailler leurs benefices par

C ij

1. Cor. 4. &  
au traité de  
pœnitētia.  
dist. 1. cha.  
conueriimi  
ni ad me. &  
en la caus.  
23. q. 4. cha  
pi. Nabu-  
chodonosor.

1. Paral. 23.  
1. Reg. 1.  
2. Paral. 17.

1. Paral. 24.

2. S. Pier. 2.  
Iob. 4.  
Gen. 7. 19.  
Numel. 22.  
& S. Iude &  
2. Paral. 29.

1. Reg. 14.

Caus. 1. q. 1.  
chap. fertur  
simoniaca  
hæresis. &  
par toute  
la quest.

## HARANGVE DE

Deut. 17.  
Cicer. au. 2.  
des offices.  
cha. 8.  
Caus. 23. q.  
3. ch. ab im-  
peratorib.  
q. 5. cha. Re-  
gi. officiū.  
& cha. ad-  
ministrato-  
res. & en la  
loy vnique  
quando im-  
pera. inter  
pupil. & vi-  
duam au  
Code.  
Suetone en  
la vie d'O-  
tho Siluie.  
& d'un au-  
tre Otho  
Bap. Egna-  
ce. liu. 3.

Herodian.

faueur, par argent, ou par amis. & si seroit  
delaissier la principale partie de vostre  
estat. qui est, d'estre équitable, & faire iu-  
stice à toutz. car il n'est assés à vn Roy  
d'estre bon, s'il ne proffitte à ses sugetz. &  
si ne veult entendre leurs plainctes, pour  
j remedier. comme faisoit Otho. ce que  
l'esleua à l'Empire, & depuis qu'il feust  
Empereur, il estoit si diligent à l'entrete-  
nir en paix, par iustice: qu'il ne permettoit  
chose qui feust contraire à l'équité. Et cer-  
tainement quand le peuple se trouue con-  
tant en la republicque, il remercie Dieu,  
d'auoir vn tel Roy ou Empereur. au con-  
traire, quād quelque malleur luy suruient,  
il remet la cause sur ses gouuerneurs: &  
cuide que c'est par la faulte de son Prinçe.  
ainsi s'estimoient tres heureux les sugetz,  
souz le regne d'Antonin. depuis après sa  
mort, quand tant de malleurs leur suruin-  
drent, ilz refferroient la cause sur l'Empe-  
reur Commode. & veritablement le peu-  
ple quelquefois porte la penitence que  
Dieu luy baille, pour le peché de son Prin-  
ce. &



ce. & qu'ainsi soit, la famine n'auint elle-  
 pas trois ans pour le peché de Saül? & l'ire  
 de Dieu sur le peuple, pour le peché de  
 Dauid? le peuple affligé, n'eust-il long  
 tēps à souffrir pour son Roy Achas? Voila  
 comme Dieu aduertist les Rois à biē vi-  
 ure. Voila comme les Prinçes se doibuent  
 prudemment gouuerner, & avec leurs su-  
 getz s'entretenir. C'est la Sunamite que  
 Dauid aima. C'est celle prudence qui fai-  
 soit craindre Salomon. ç'est elle qui fait  
 les Prinçes cōmander: & fait que les puis-  
 sans sont obeis en administrant iustice.  
 sans laquelle, l'on les appelle Tirās. & tout  
 le peuple acourt sur eux. comme firent les  
 Siçiliens cōtre Denys le tirant. & les Agre-  
 gantins contre Phalaris. comme firent les  
 Maçedoniens, qui abandonnerent & de-  
 laisserent leur Roy Demetrie. & Trasibu-  
 le apres auoir banni les trēte Tirans de la  
 republique d'Athenes, introduit la loy  
 Amnestie, c'est à dire la loy d'obliance  
 des maus passés. & leur fist administrer la  
 iustice. qui est le vray moyen de bien po-

2. Samu. 21.

2. Samuel

12. 24.

1 Para. 21.

2. Para. 28.

Salomon

Cant. des

cant. 6. 7.

Prouer. 8. 9.

Cicer. au. 2.

des offices.

chap. 4.

Valere liu.

2. &amp; Flauc

Vopisque

en la vie

d'Aurelian.

## HARANGVE DE

Prouer. 21.  
Parali. 23.  
1. Reg. 1.

2. Paral. 19.  
Deut. 1. 10.  
& 16.  
Exo. 23.  
Leuiti. 19.  
Roma. 2.  
Galar. 2.  
Ephe. 6.  
Coloss. 3.  
Act. 10.  
2. S. Pier. 2.  
Eccle. 20. &  
la loy De  
ambitu aus  
Digestes.

Deut. 1. 16.  
Exo. 23.  
Leuiti. 19.  
Eccle. 42.  
Prouer. 24.  
& 29.  
S. Iean. 7.  
S. Iac. 2.

Ciceron au  
1. des offi-  
ces. chap. 3.

liçer & administrer vn rojaulme. car sans iustice, sans prudence & diligēçe des ministres du Prinçe, la republicque ne peult iamais se maïtenir. ni plus ne moins, que la nauire sur la mer, estre cōduite à bord sans pillote. Les Rois se seruent des ministres en la iustice: cōme ilz ont accoustumé d'employer les Cappitaines aus regimens de leurs armées. & tout ainsi que l'on ne baille point telles charges, qu'à gens experimentés, doibt le Prinçe eslire les hommes vertuëus, cappables, gens de bien, hommes veritables, & haïssans auarice: qui ne se laissent corrompre par dōs, qui ne preingnent aucun present: ains selon les ordonances, & loix de Dieu, qui iugent iustement entre l'homme & son frere, & entre son estrangier: & sans auoir regard à personne en iugement, qui entendent autant le petit comme le grād: brief le Roy doibt eslire les persōnes qui craignent Dieu, pour les pouruoir des estat兹 de iudicature, gratuitement. car autrement seroit vilainement acquerir par argent ce que ce

que ce doit obtenir par vertu, & le Roy mesmes peult estre la cause de la corruption qui s'en pourroit faire, si leur vendoit leurs estatz. pourçe, qu'il fault que celluj vende, qui a achepte: ou qu'il se recompense. iacoit que le Prince ne doit estre plus rigoureux enuers aucun, qu'à punir telles personnes, qui gastent ce qui est bon & sainct. c'est la iustice, au lieu de la cōseruer, & bien administrer. & n'y doit employer que le moins qu'il pourra d'officiers: & les reduire à certain & necessaire nombre. comme fist Auguste les Senateurs, qui auoiēt creu de cent, par sus mille ou douze cens. d'ont le populaçe par mocquerie les nommoit auortons. car la multitude, cause tousiours confusion. & comme vulgairement est dict, la multitude des medecins, tuë plus-tost que ne guerist le mallade. Les Romains au commencement de leur republicque, faisoient obeir toutes les autres nations. mais depuis qu'ilz introduirent si grand nombre d'officiers, bien-tost elle fust reduitte à

Arist. 7. des  
Politi. cha.  
14. 15. & 29.

Platon en  
sa repub.

Suetone au  
35. chap. de  
la vie d'Auguste.



## HARANGVE DE

Strabon au  
4. & Cicer.  
au. 2. des  
offices. &  
en l'oraisō  
pour. l. Flac  
ce.

Aristote. 7.  
Politi. cha.  
14. & 15.  
Plutar. &  
Suetone de  
Galba. cha.  
7. 9. 13.

La loy. 1. &  
2. aus Dige  
stes de re-  
cep. arbit.  
Costumes.

La loy ab  
accusatio-  
ne sur la fin  
ad senatus-  
cōs. Turpil.

troubles & confusion. la republicque de  
Marseille fust long temps louée & en ad-  
miration pour l'équité de sa iustice. mais  
depuis que le nombre des officiers creut  
iusques a six çens, ne fist que tumber à de-  
cadence. Ce n'est que le dommage d'une  
republicque, d'auoir tant de Magistratz,  
qui viuent aus despens du publicq. & qui  
par longueur de procès nous destruisent,  
& engendrent infinies querelles. L'on vi-  
uroit en plus grãde tranquillité, & la Fran-  
ce seroit en plus grand repos, & à vous  
Sire, plus grand plaisir, si vous doniés le  
moyen au gẽtillomme d'y estre employé.  
comme estoit la volonté du tres-grand &  
admirable Roy François vostre ajeul. d'au-  
tant que les Nobles ont plus en recōmen-  
dation l'honneur, que leurs vies propres.  
Le remede plus prōptement aussi se trou-  
ueroit, par arbitres, & q̃ les loix de Dieu,  
& lois municipales en chacune ville, fus-  
sent bien gardées. & qu'il n'y eust que peu  
de procès & d'accusations necessaires. &  
que tant de faulx accusateurs, opiniatres  
plaideurs,

plaideurs, brouillons & vermine de palais, feussent suiuant les loix, punis. Ainsi la belle Astrée nous r'ameneroit l'aage doré. ainsi le bon tēps reuiendrait en France. ainsi reuiroions la tranquillité desirée du regne de Philippes le Bel. qui quand le Palais de Paris feust basti, se logeoit lēans: ne craignāt d'estre importuné par les solliciteurs des procès: pourçe qu'il j en auoit bien peu. il faudroit aussi suiuar voz ordonances, que les confiscations ne feussent données auant la condemnation, & celles des condamnés, soient conuerties à oeuvres pitoiables. C'est le vray moyen, de r'achapter la paix publicque, vnion & concorde entre toutz estat. ainsi nous & nostre posterité nous resenterions de vostre iustice & benignité. O bōté de Dieu, ce seroit la lumiere éclairante à toutes tes creatures! ce seroit le plaisir & proffit que voz estat. Sire, nous doibuent apporter. Ce sont les trois estat, que Hippodame Milleisien en sa republicque recherchoit. Ce sont les trois estat, que Diotime di-

D

aus Digestes.  
& la loy quif-  
quis, au Code  
de calumnia.  
que les Empe-  
reurs Hono-  
ré & Theodo  
se ont fait.

Annales de  
France.

Des opinia-  
tres plaideurs  
Iustinian l'Em-  
pereur escri-  
uit à Iulien la  
loy. *properan-  
dum* au Code  
de iudiciis. &  
en ses institu-  
tiōs du droit  
ciuil aus pa-  
ragrāfes *Hæc*  
*autem.* & *nūc*  
*admonēdi.* &  
*idq;* eo maxi-  
mē tiltre 16.  
liu. 4. de *pe-  
na* tēp. *liti-  
gan.*

Francois pa-  
trice de la ré-  
pub. & Vol-

## HARANGVE DE

terran en sa  
Filologie.  
Aristo. aus  
Politiq. cha  
pi 6.

Aristote au  
2. des Poli-  
tiq. cha. 7.  
& Plurarq.  
parlant de  
Numa &  
Lycurge.

1. des Rois  
12. & 2.  
Chro. II.

Prouerb. 29  
16. Eccle. 9.  
Sages. 6.

Platon en  
la repub. &  
au dialo-  
gue ciuil  
ou du re-  
gne.

soit estre neçessaires pour la conseruation  
des Rojaulmes. Ce sont les trois choses  
que les Rois doibuent desirer, d'auoir la  
religion, ç'est à dire la netteté de leurs cõ-  
scienc̃es. la Noblesse, pour sa deffençe par  
les armes. & la iustice pour la cõseruation  
de leurs sugetz. tellement, que si ensem-  
blément nous j'employons, chacun selon  
la vacation, à laquelle Dieu l'a appellé,  
que toutz, ainsi que la trouffe de Scilure  
bien garnie de fiesches, fortifierons çe  
corps de France, & la verrons plus que ia-  
mais florissante. pourueu que par vostre  
reiglement vous nous ostés les causes des  
seditions. Les seditions, qui ont destruiet  
toutes les republicques. & aneanti les  
rojaulmes. qui ont fait raser les murailles  
des villes, que la foudre mesme ne pou-  
uoit acabler. La paix & le repos publicq,  
sont les plus fortes murailles du monde.  
sont les nerf du Prince. ç'est l'animal im-  
mortel, entre les autres prouinçes & re-  
gions. Sire, vous estes le Roy, qui pouués  
doref-en-auant rēdre telle la France. vous  
estes



estes de Dieu ordonné, pour seruir à vostre peuple de pere & vray pasteur. nous vous debuons obeissance & fidelité. Dieu nous a appellés & reserués pour la deffence de vostre prosperité, pour la tuition de voz pais, & augmentation de vostre Rojaulme. ce que nous toutz ensemble desirons. Et affin qu'ajons le moyen de vous secourir de noz forces & puissances, Sire, il vous fault maintenir la Noblesse en ses priuileges, franchises & libertés, aussi antiques que l'institution des Rois. & qui ne peuuent par raison estre separées & desmembrées de leur estat & cōdition, sans que le Prince n'offence par trop soy-mesme. diminuë & affoiblisse la grandeur de sa maiesté. de laquelle, la Noblesse est la principale colombe. Plaise vous doncq Sire, de les nous continuër & maintenir. si vous supplions, que ne laissés eschapper vne si bonne & louable occasion. Que ceste si honorable compaignie ne soit en vain assemblée. Qu'il ne soit plus par les enuiës de vostre couronne, & haineus de

Homere  
parlât d'A-  
gamēnon.  
Platō au. i.  
de la repu-  
bli. & au  
dialogue ci-  
uil, ou du  
regne.  
1. S. Pier. 2.  
Tite. 3.

Daniel. 4. 5

voz sugetz dict, Qu'en Frâce j a plusieurs  
assemblées pour bonnes & iustes causes:  
mais peu de resolution. Ce que ne plaise à  
Dieu, que maintenant aduienne.

F I N.

EXTRAICT DV PRIVILEGE  
DV ROY.

Par grace & priuilege du Roy, il est permis & octroyé à  
Charles Perier, Libraire iuré & Imprimeur en l'vniuersité de  
Paris, d'imprimer, ou faire imprimer, tant de fois, & en tel nom-  
bre que bon luy semblera, ceste presente Harangue de par la  
Noblesse de toute la France au Roy Charles neufiesme tenant  
ses estatz en sa ville d'Orleans prononcée par le Seigneur de  
Rochefort. Et sont faictes inhibitions & defences à tous autres  
Libraires & Imprimeurs & personnes quelconques, de n'impri-  
mer, ne faire imprimer, vendre ny distribuer, en ses païs, terres, &  
seigneuries, autres que celles qu'aura imprimé ledict Perier : &  
ce durant le temps & terme de trois ans finis & accomplis : sur  
peine de confiscation des autres qui auroient esté autrement  
imprimez, & d'amende arbitraire, comme plus à plein est conte-  
nu & declaré audict priuilege, sur ce donné à Paris, le 25.  
Ianuier 1560.

Par le Conseil

Signé

De Luc.









